

casu dubii de valore censuræ, et in casu gravis necessitatis?

I. Dubium versatur circa jus, vel circa factum, vel circa iustitiam censuræ, an a legitimo judice, servatis servandis, prolata fuerit.

In *dubio juris*, non est obligatio servandi censuram. Deducitur e regula generali : *in obscuris minimum est sequendum... in pœnis benignior interpretatio est facienda*, quam valere pro foro interno, non secus ac pro foro externo, docent communissime theologi.

Idem probabiliter dicendum est de *dubio facti*, an peccatum commissum sit cum conditionibus jure statutis ut censura incurritur. Judex abstinere debet a plectendo reum in casu dubii facti, ne in periculum incurrat puniendi innocentem ; cur reus, in pari dubio, teneretur semetipsum pena afficere, abstinentia a communione bonorum ecclesiasticorum ? Aliunde, plurimorum est opinio neminem teneri in *dubio facti* se habere uti censura innodatum ; hæc autem sententia, quam tot canonistæ propugnant, sufficit ad inducendum dubium juris. Periculum ne reus sibi illudat reperitur in multis aliis casibus, sive de censura jure lata agatur, sive de obligationibus, in quibus unusquisque sequi debet dictamen suæ conscientiæ.

Quando dubium versatur circa *factum judicis*, an exceserit limites suæ jurisdictionis, an formas præscriptas servaverit, censura servanda est. Ordo publicus exposcit ut obsequium præstetur judici, nisi manifesta sit nullitas sententiæ, alioquin pessum daretur, cum magno detimento societatis, subordinatio auctorati constitutæ debita. In hoc igitur casu prævalet regula quam invocat Innocentius III in cap. *Illud*, 5, DE CLERICO EXCOMMUNICATO, lib. V Decret., de quodam Episcopo qui rationem non habuerat sententie quam contra illum tulerat Legatus Sanctæ Sedis, prætermis quibusdam solemnitatibus juris : « Quia in dubiis via est eligenda tutior, etsi de sententia in eum lata dubitaret, debuerat tamen potius abstinere, quam sacra-

« menta ecclesiastica pertractare. » Eadem ratione Clemens III Archiepiscopo Senonensi rescripsit de clero qui de sententia contra se prolata querebatur, nullam allegando causam nullitatis : « Nisi gratiam absolutionis imploret, non debet audiri, « ne sententiam ecclesiasticam contempnere videatur, et per hoc « amplius ex suo contemptu ligetur. » (Cap. *Per tuas litteras*, 40, DE SENT. EXCOMMUNICATIONIS.)

II. Ratio necessitatis excusat reum quominus servet censuram qua ligatur, quando censura est occulta et non potest eam servare sine gravi sui detimento, vel aliorum scandalo. Notabile detrimentum reputatur, si quis debeat gravem suspicionem contra seipsum mouere, sicque infamiae periculo exponi ; erit scandalum proximi, si populus exinde inducendus sit ad murmurandum graviter, vel ad temere judicandum de presbyteris, aut ad aliquid simile. In his magna quidem prudentia opus est ad ponderandum et periculi et nocimenti gravitatem ex una parte, et ex alia qualitatem actionis prohibitæ et circumstantias ejus, ut judicari possit, an obligatio censuræ suspendatur. « In « communi tamen loquendo, ait Suarez, non videtur dubium « quin in hoc capite cessare possit. » Ratio est quod leges humanæ ac positivæ non obligant cum tanto incommodo, quale censemur infamia sacerdotis, aut proximi scandalum.

Solutio data extenditur ad omnes effectus censuræ, ne exceptis quidem participatione sacramentorum et celebratione sancti sacrificii. Hæc participatio non est aliquid intrinsece malum, cum is qui censura ligatur possit coram Deo justificari per contritionem, vel per confessionem bona fide ac requisitis dispositionibus factam ; ergo solummodo obstaret prohibitus Ecclesiæ, quæ in præsenti casu non urget. (Suarez, disput. vi, sect. iii, n^os 13-20.)

III. — Non diximus de casu quo certo constaret de nullitate aut de injustitia censuræ. Inter omnes convenit censuram nullam, vel certo injustam, non obligare in foro conscientiæ. Sed plerumque necessitas removendi scandalum, inducit obligatio-

nem deferendi judici, donec sublata sit censura per absolutiōnem ad *cautelam*, vel per auctoritatem superioris.

§ 2. De excommunicatione.

*769. — I^o Quid et quotuplex sit excommunicatio?

I. Excommunicatio est censura ecclesiastica separans christianum a communione Ecclesiae, et idcirco privans participationē bonorum communium Ecclesiæ.

Sanctus Paulus dixit de communione sanctorum : « Multi « unum corpus sumus in Christo; singuli autem alter alterius « membra... Crescamus in illo per omnia, qui est caput Christi « tus : ex quo totum corpus compactum et connexum per omni- « nem juncturam subministrationis, secundum operationem in « mensuram uniuscujusque membra, augmentum corporis facit « in ædificationem sui in charitate. » (Ad Romanos, cap. XII, 5, ad Ephesios, cap. IV, 15, 16.) Nos igitur omnes qui sumus membra Christi, participamus bona spiritualia quæ Christus in suum corpus mysticum effundit. Hæc autem spiritualia dona procedunt, alia immediate a Christo capite, alia immediate ab Ecclesia cui Christus plurima dedit ab ipsa cæteris communicanda, alia demum a privatis fidelibus qui nos sua oratione Deo commendant. Porro, excommunicatio privat bonis spiritualibus quæ habemus ab Ecclesia, scilicet sacramentis, divinis officiis, suffragiis communibus, neutquam vero bonis quæ a Christo immediate obtinemus, donis Spiritus sancti, virtutibus infusis, nec etiam bonis quæ nobis adveniunt ex precibus et suffragiis privatis fidelium.

II. Duplex olim distinguebatur excommunicatio, *medicinalis* et *mortalis*. Excommunicatio quam medicinalē appellabant, infligebatur pro leviōribus criminibus, et varios gradus habebat : alios a sola Eucharistie participatione, alios a fidelium precibus excludebat. Hæc species excommunicationis fuit in-

flicta clericis inferioribus, non secus ac laicis. Excommunicatio mortalis ferebatur pro gravioribus delictis et privabat omnibus bonis dispensationi Ecclesiæ commissis.

Alia erat species excommunicationis propria clericis, quam nimis unus, v. g., Episcopus ab altero seu a pluribus aliis ejusdem provinciæ separaretur, adeo ut hi Episcopi neque darent nec ab invicem acciperent litteras formatas, neque alter alterum ad celebrationem officiorum admitteret, uti mos erat deferre, honoris causa, Episcopo extra suam diœcesim degenti, neque tandem alter alterius Ecclesiæ filios ad communionem admitteret¹.

Juxta præsentem disciplinam duplex etiam distinguitur excommunicatio : *Minor*, quæ privat receptione sacramentorum et inhabilem efficit clericum ad beneficia et munia ecclesiastica ; et *Major*, quæ omnino separat a societate fidelium et privat omnibus bonis quæ sunt in potestate Ecclesiae. Regula generalis est sub denominatione communi *excommunicationis* comprehendti excommunicationem majorem, nisi sit aliquid in textu quo censura restringatur. « Si quem sub illa verborum forma : « illum excommunico, vel simili, a judge suo excommunicari « contingat, ait Gregorius IX, dicendum est eum non tantum « minori, quæ a perceptione sacramentorum, sed etiam majori « excommunicatione, quæ a communione fidelium separat, « esse ligatum. » (Cap. Si quem, 59, DE SENT. EXCOMMUNICA- TIONIS, lib. V Decret.)

Canonistæ disserunt de excommunicationibus quæ decernuntur, monitionibus præmissis, ad finem revelationis, ut aiunt, pro detegendo auctore criminis, aut pro rebus deperditis, seu subtractis. Harum excommunicationum frequens erat usus in

¹ Clemens XI retraxit suam communionem a quibusdam Episcopis Galliæ parti Jansenistarum addictis, declarando illos tanquam a sua et S. Romanæ Ecclesiæ caritate prorsus segregatos haberi; nullamque proinde ipsi et S. Romanæ Ecclesiæ cum illis communionem ecclesiasticam eastigaram, donec integre resipiserent. (Const. Pastoralis officii, an 1718.)

Galliis. *Monitoria* dicebantur mandata quibus judex ecclesiasticus præcipiebat sub pena excommunicationis ut qui novissent auctorem alicujus delicti illum manifestarent. Parochus monitoria edicebat, ex præscripto officialis, in Missa parochiali. Elapsis tribus hebdomadis excommunicatione ferebatur, tum in reos delicti, tum in omnes qui revelare neglexerant. Multæ quæstiones ea de re movebantur quibus supersedemus, quia in desuetudinem venit praxis monitoriorum... Cæterum, ratio finis ad quem censura fertur nullum statuit discrimen inter unam et alteram excommunicationem¹.

Canonistæ distingunt insuper excommunicationem majorem ordinariam ab *anathemate*; sed non consentiunt in explicando quale discrimen inter utrumque intercedat. Nonnulli asserunt anathema esse potius pœnam quam censuram, et iis infligi qui postquam excommunicatione majori notati fuerint, in sua contumacia pervicaces manent, spreta Ecclesiæ auctoritate. Anathematizati jura omnia ecclesiastica radicitus amisisse censentur, dum excommunicati, licet extra Ecclesiam ejecti, aliqua tamen jura in radice servant. Hinc concludunt opus esse anathematizatis dispensatione tanquam a pœna; excommunicatis autem absolutione tanquam a censura. Hocce discrimen deducendum existimant e textibus juris quibus anathema exhibetur uti longe gravius excommunicatione. Sic Cœlestinus III de clero homicida dixit: « Deponendus est; qui si depositus incorrigibilis fuerit, excommunicari debet; deinde, crescente contumacia, anathematis mürcone feriri. » (Cap. *Cum non ab homine*, 10, DE JUDICIS, lib. II Decret, Cap. *Engeltrudam*, 12, caus. III, quæst. IV.)

Communior opinio est *anathema* non differre ab excommunicatione majori, nisi forte ratione cæremoniarum et publicæ denuntiationis quæ plus terroris incutiunt. Probatur praxi conciliorum, SS. Pontificum, et præsertim synodi Tridentinæ, quæ utramque formulam indiscriminatim adhibuerunt. Ergo,

¹ Collet, *de Censuris*, part. II, cap. I, sect. II.

quidquid sit de veteri disciplina, hodie saltem anathema non differt substantialiter ab excommunicatione majori; si quandoque excommunicationibus jure latis adjungitur anathema, ita sit ut indicetur major gravitas delicti¹.

*770. — II^o *Qui sint effectus excommunicationis majoris quoad ipsum excommunicatum?*

Excommunicatus privatur generatim bonis communib[us] Ecclesiæ; quapropter :

1^o *Nullum sacramentum recipere potest*, excepto tamen quod in articulo mortis admittatur ad sacramentum Pœnitentiæ, Eucharistiæ et Extremæ-Untionis. Excommunicatione non obstareret quin pœnitens valide absolveretur, nisi peccatum sit reservatum superiori; sed Ecclesia prohibet ne detur absolutio a peccatis, nisi prius impedita sit absolutio a vinculo excommunicationis.

2^o Non potest interesse *divinis officiis*, sancto nempe sacrificio et precibus publicis. Non vetatur orare privatim in Ecclesia, nec sacram concessionem audire. Omni tempore servata fuit ea de re disciplina quam inculcat decretum Concilii Carthaginensis : « Episcopus nullum prohibeat ingredi Ecclesiam et « audire verbum Dei, sive gentilem, sive hereticum, sive ju- « dæum, usque ad Missam catechumenorum. » (Dist. I, DE CONSECRATIONE, cap. 57.)

3^o Partes non habet in *suffragiis Ecclesiæ*; quod intelligitur etiam de defunctis qui mortui sunt in excommunicatione, juxta declarationem datam ab Innocentio III : « A nobis est sæpe « quæsitus, utrum si aliquis excommunicatus, in quo indicia « fuerint pœnitentiæ manifesta, nec per eum steterit quominus « reconciliaretur ecclesiasticæ unitati, non suscepto absolutionis « beneficio decesserit, pro absoluto ab Ecclesia sit habendus, « et utrum pro tali recipienda sit eleemosyna, et a fidelibus sit

¹ Cf. Berardi, *Commentaria in jus ecclesiasticum*, tom. IV, part. II, dissert. III, cap. VI — Suarez, disput. VIII, sect. II, n^o 2-9.

« orandum? Consultationi tuæ respondemus quod... quanta-
 « cumque pœnitentia signa præcesserint, si tamen morte præ-
 « ventus absolutionis non potuerit beneficium obtinere, quamvis
 « absolutus apud Deum fuisse credatur, nondum tamen haben-
 « dus est apud Ecclesiam absolutus. Potest tamen et debet ei
 « Ecclesiæ beneficio subveniri, ut si de ipsius viventis pœni-
 « tentia per evidētia signa constiterit, defuncto etiam absolu-
 « tionis beneficium impendatur. » (Cap. *A nobis*, 28, DE
 SENT. EXCOMM.) Suarez exinde concludit excommunicatum non
 posse uti sacramentalibus, aqua benedicta, etc., quatenus
 ordinantur ad percipiendum aliquem fructum specialem ex me-
 rito et suffragiis Ecclesiæ, quamvis iisdem sacramentalibus uti
 possit ut mediis aptis ad excitandum sensum pietatis. (Disp. XII,
 sect. III.)

4º Non potest sponte sua se ingerere in *administrationem sacramentorum*, sed ea solummodo administrare quando fideles ad illum recurrunt; quapropter sacramenta, non in sui sed in aliorum utilitatem, in casibus jure præfinitis, dispensat.

5º Est inhabilis ad recipiendum *beneficia et officia ecclesiastica*; unde sequitur collationem officii factam excommunicato irritam esse ipso jure, et consequenter irrita etiam fore jurisdictionis acta vi hujus officii, nisi forte valeant ratione tituli colorati juncti cum errore communi (nos 284-288). Si censura supervenerit officio jam adepto, non privat excommunicatum titulo valide acquisito; sed reus desitui potest sententia judicis, si neglexerit postulare beneficium absolutionis.

6º Non potest partes actoris sustinere *in judiciis ecclesiasticis*, si publice fuerit excommunicatus. (Cap. *Exceptionem*, 12, DE EXCEPTIONIBUS, lib. II Decret.) Si vero non fuerit juridice denunciatus, potest pro arbitrio judicis admitti aut repelli, ratione habita circumstantiarum. In duplice casu admittendus erit: 1º quatenus actor, in causa suæ excommunicationis, si probare intendat excommunicationem contra sé latam fuisse ipso jure nullam; vel si urgeat ratio salutis, ut in causa matri-

moniali. 2º Quatenus reus, quoties in judicium adducitur, quod Alexander III ita definivit: « Quia postulasti a nobis utrum excommunicatus in judicio stare possit? Respondemus quod conveniri potest, et debet per alium respondere in judicio, ne videatur de sua malitia commodum reportare. » (Cap. *Intelleximus*, 7, DE JUDICIIS.)

Controvertitur utrum eo in casu excommunicatus teneatur procuratorem sibi constituere. Videtur regulariter teneri ex verbis allatis Alexandri III; sed in his, utpote quæ ad proxim nil conferant hodiernis temporibus, non immorabitur¹.

7º Tandem privatur sepultura christiana si denunciatus sit; si non sit denunciatus, non privatur sepultura ratione excommunicationis, sed privari posset quatenus peccator publicus et obstinatus, quia notorietas peccati gravoris et impœnitentiae, causa est sufficiens cur aliquis non sepeliatur in loco sacro, cum ritibus et precibus consuetis (no 569).

Diximus effectus spirituales excommunicationis. Alios effectus temporales superaddidit disciplina vetus, ex quibus alii decursu temporum temperati sunt, alii in desuetudinem lapsi, ob immutationem inductam in moribus publicis. Ab ipsis initii Ecclesiæ S. Paulus fideles admonuit ne commiserentur, nec cibum sumerent cum peccatoribus publicis. « Si quis venit ad vos, ait sanctus Joannes, et hanc doctrinam non affert, nolite recipere eum in domum, nec ave ei dixeritis; qui enim dicit illi ave, communicat operibus ejus malignis. » (Epist. S. Pauli ad Corinth., I, cap. v, 11; — S. Joannis, II, 10 et 11.)

Ex præscripto apostolorum invaluit disciplina ut fideles vitarent consortium peccatoris excommunicati, qui, exors quodammodo societatis, nec orare, nec loqui nisi in necessariis, nec vesci poterat cum cæteris fidelibus. (Cap. *Cum excommunicato*, 18, caus. XI, q. III.) Præterea, si, intra certum tempus præfixum, non resipiseret, suis bonis temporalibus privabatur:

¹ Cf. *Commentaria canonistarum in titulum I, DE JUDICIIS*, lib. II Decretalium.

habebatur infamis, intestabilis, atque ad officia vitae civilis inhabilis. Plura monumenta hujus disciplinae reperiuntur in canonibus conciliorum, in SS. Pontificum decretis, et etiam in principum sæcularium statutis, ex quibus unum, exempli causa, citabimus quod edixit S. Ludovicus rex Francorum : « Statuimus ut excommunicati vitentur secundum canonicas sanctiones; et si aliqui per annum contumaciter in excommunicatione persistenterint, ex tunc temporaliter compellantur redire ad ecclesiasticam unitatem, ut quos a malo non retrahit timor Dei, saltem poena temporalis compellat. Unde præcipimus quod balivi nostri omnia bona excommunicatorum mobilia et immobilia per annum capiant, nec eis aliquo modo restituant, donec prædicti absoluti fuerint, et Ecclesie satisficerint; nec tunc etiam nisi nostro speciali mandato¹. »

771. — III^o *Qui sint effectus excommunicationis majoris quoad fideles?*

Vi excommunicationis, fideles ab excommunicati consortio abstinere debent. Cum autem nimis exinde coartaretur libertas humani commercii, lex paulatim moderata fuit. S. Gregorius VII a lege generali excipi voluit « uxores, liberos, servos, ancillas seu mancipia, necon rusticos et serviennes². » Martinus V, per celebri Constitutione *Ad evitanda scandala* in concilio Constantiensi promulgata, prohibitionem veteri disciplina sancitam restrixit, respectu omnium, ad excommunicatos denuntiatos. Haec habet Constitutio : « Indulgemus quod nemo deinceps a communione alicujus, in sacramentorum administratione vel receptione, aut aliis quibuscumque divinis, intus vel extra, prætextu cuiuscumque sententiae, aut censuræ ecclesiastice, a jure vel ab

¹ Labbe, *Col. conciliorum*, tom. XI, col. 241. Baluze, *Capitularia regum Francorum*, tom. I, pag. 17, 172, 1071, refert leges Childeberti, Pippini et Caroli Magni, quibus privatione bonorum et exilio plectebantur qui sententiam excommunicationis contempserant.

² Labbe, tom. X, col. 371.

« homine generaliter promulgatae, teneatur abstinere, vel aliquid quem vitare, nisi sententia illa, aut censura, fuerit... a judice publicata vel denuntiata specialiter et expresse, constitutis apostolicis, et aliis in contrarium facientibus, non obstantibus quibuscumque : salvo si quem, pro sacrilega manum injectione in clericum, sententiam latam a canone adeo notorie constiterit incidisse quod factum non possit ullam tergiversatione celari, nec aliquo suffragio excusari... Per hoc tamen hujusmodi excommunicatos, suspensos, et interdictos, non intendimus in aliquo relevare, nec eis quomodo libet suffragari. »

Constitutio Martini V inserta fuit in concordato Leonis X cum Francisco I, et in Actis Concilii Lateranensis, sed paululum immutata, in eo scilicet quod exceptio quæ primitus facta fuerat in concilio Constantiensi pro casu solum percussionis sacrilegiae clerici, extenderetur generatim ad omnem casum notorietatis; adeo ut debuissent vitari hi omnes quos ita notorie constabat excommunicationem incurrisse, quacumque ex causa, ut nulla tergiversatione celari posset. At vero prævaluit ubique, vi consuetudinis et communissimæ doctorum sententiae, limitatio ad duplicum casum, scilicet 1^o ad illos qui notorie pertinent ad sectam ab Ecclesia excommunicatam et præcisam ab unitate catholicæ; 2^o ad casum percussionis clerici. « Hæc sententia vera est, ait Suarez, scilicet limitandam esse prohibitionem juxta formam attributam concilio Constantiensi..., tum maxime quia usu totius Ecclesiæ ea forma jam est approbata et recepta, ut referunt auctores, et constat ex usu Galliæ et Germaniæ, etc., ubi catholici communicant sine scrupulo cum hæreticis publicis et schismaticis. » (Disput. ix, sect. II, n^o 5.) Imo ipsam exceptione pro casu percussionis clerici videatur longa consuetudine obsoletuisse in Galliis, ubi non vitatur percussor nisi intercesserit sententia declaratoria. (Cf. E weilon, chap. III, art. III.)

His præmissis, distinguendum est inter excommunicatos

denuntiatos et excommunicatos toleratos, ut determinetur quousque fideles teneantur abstinere ab eorum consortio.

772. — I. Fideles tenentur abstinere, in divinis, a communicatione cum *excommunicatis denuntiatis* : possunt tamen orare privatim pro illis.

1º Ex prima parte assertionis sequitur conferenda non esse sacramenta excommunicatis denuntiatis, nec ab illis recipienda, excepto tamen casu necessitatis : sequitur etiam illos non admittendos esse ad officia publica, nec sepeliendos in loco sancto.

Violatio hujus prohibitionis est peccatum grave, nisi necessitate excusetur, et inducit excommunicationem minorem. Gravior pœna, excommunication major, irrogatur iis « qui pro « priæ temeritatis audacia, excommunicatos publice... scienter « sepelire præsumunt..., a qua nullatenus absolvantur nisi « prius ad arbitrium diocesani Episcopi satisfactionem exhibent competentem. » (Cap. *Eos qui*, 1, DE SEPULTURIS, in Clementinis.)

2º Ex altera parte assertionis, qua scilicet declaratur licitum unicuique esse orare privatim pro excommunicatis denuntiatis, concludimus sacerdotem orare posse, etiam intra missam in *memento*, pro excommunicatis; quia hæc oratio reputatur privata. (Gavantus, *Commentaria in Rubricas Missalis*, part. II, tit. viii, n° 8.)

3º Prohibitio olim facta vitandi consortium vitæ civilis, et valde moderata decretis S. Gregorii VII, videtur hodie penitus obsoleuisse, adeo ut fideles non teneantur vitare in vitæ civilis consortium excommunicatos personaliter denuntiatos, et ad sectam separatam pertinentes, nisi quatenus id jure naturali ipsis vetitum foret, ratione circumstantiarum, periculi nempe aut scandali.

*773. — II. Quod ad rationem agendi fidelium cum *excommunicatis toleratis* attinet, vidimus fas esse, ex constitutione Martini V, cum eis communicare in humanis et in divinis, ad-

jecto tamen quod in eo *excommunicatos nec relevare, nec iis quomodolibet suffragari* intendat Ecclesia.

Hinc oritur duplex dubium : I^{um} an liceat sacramenta ab excommunicato postulare ; II^{um} an liceat illum invitare ad assistendum divinis officiis.

Ad I^{um} : Non prohibetur vi censuræ quominus fideles sacramenta postulent ab excommunicato tolerato ; saepius autem obstat jus naturale, ut præcaveatur occasio scandali. Jus naturale vetat dare occasionem sacrilegæ administrationi sacramentorum et scandalo, nisi urgeat necessitas utrumque permittendi ut obtineatur auxilium quo indigemus : atqui timendum est ne sacerdos excommunicatus se reum sacrilegii constitutus sacramenta administrando, et ne fideles scandalizentur ex illa communicatione, si statum ejusdem sacerdotis noverint ; ergo, nisi urgeat necessitas sacramenta aliave auxilia spiritualia recipiendi, quæ ab altero obtineri commode nequeunt, illicitum erit recurrere ad ministerium sacerdotis excommunicati tolerati.

Ad II^{um} : non deberemus invitare excommunicatos toleratos, et multo minus hæreticos ad sectam separatam pertinentes, ut assistant sacris officiis, solemnitati nuptiarum, exequiis ecclesiasticis catholicorum, si standum esset severitati veteris disciplinæ. Sed rigor ille videtur consuetudine fidelium et ex benignitate Ecclesiæ temperatus ; non solum excommunicati tolerati et ipsi hæretici notorii, v. g., protestantes, recipiuntur absque scrupulo quando Ecclesiam adeunt animo assistendi divinis officiis, modo decenter se habeant, sed et invitantur quoties spes affulget illos occasione solemnitatum et sacrarum cæremoniarum adducendi ad unitatem fidei catholicæ (n° 723).

774. — IVº *Utrum offerre licitum sit S. Sacrificium pro excommunicatis, sive denuntiatis, sive toleratis?*

Ex dictis supra non possunt applicari excommunicatis suffragia Ecclesiæ ; cum vero S. Sacrificium non sit suffragium nisi quatenus offertur nomine Ecclesiæ cum participatione bo-

norum communium, et producat suos effectus essentiales independenter ab interventu Ecclesiæ, quæstio est an possit offerri pro excommunicatis.

Prænotandum est, ad solutionem quæstionis, 1º triplicem distingui fructum S. Sacrificii, unum quem producit *ex opere operato*, dummodo nullum obstet impedimentum; alterum qui procedit ex precibus, meritis et suffragiis Ecclesiæ; tertium qui procedit ex opere operantis presbyteri, et quem vocant fructum medium: 2º triplicem illum fructum esse vel generalissimum, in quantum diffunditur in omnes homines, vel generalem prout applicatur omnibus membris Ecclesiæ, vel specialem, prout derivatur, per intentionem sacerdotis, in eos quos specialiter Deo commendat.

*775. — His prænotatis statui possunt sequentes assertiones:

ASSERTIO 1^a. *Illicitum est offerre sacrificium pro excommunicatis denuntiatis, et pro hæreticis seu schismaticis ad sectam publicam ab Ecclesia separatam pertinentibus, eorum nomen publice, intra sacra mysteria, pronuntiando.*

Haec oblatio, publice facta cum memoria nominis excommunicatorum, merito censeretur communicatio in divinis quam canones vetant. « Sacri canones, ait Benedictus XIV, pro excommunicatis orari publice vetant, uti cautum legitur in cap. *A nobis*, 28, et in cap. *Sacris*, 38, DE SENT. EXCOMM. « Et quamvis id non obstet quominus pro eorum conversione orare liceat, hoc tamen ita præstari non debet ut eorum nomina in solemni sacrificii prece pronuntientur, quod plene congruit veteri disciplina. Satis est in eum finem, mente animoque Deum optimum maximum rogare ut aberrantes ad viam salutis et ad sanctæ Matris Ecclesiæ sinum reducere dignetur... Neque ut huic christiana charitatis officio satisfiat, necesse est intervertere leges Ecclesiæ quæ a fidelium sibi obsequentium catalogo excludit eorum nomina qui se ab illius unitate et obedientia separarunt; quæque dum prohibet

« ne pro his publice oretur, eorum certe commemorationem ab officio Missæ, quæ publicum est sacrificium, excludit. » (Const., *Ex quo*, an. 1756.)

*776. — **ASSERTIO 1^a.** *Licitum est offerre sacrificium in genere pro omnibus excommunicatis, etiam denuntiatis, ut redeant ad unitatem catholicam, et item probabiliter pro nonnullis in individuo, vivis aut defunctis, modo non pronuntietur illorum nomen, et sacerdos non intendat illis applicare suffragia Ecclesiæ.*

Prima pars probatur ex praxi Ecclesiæ quæ preces publicas habet et missas pro tollendo schismate, pro hæreticorum conversione, pro salute omnium peccatorum: porro, quoties sacerdos in eum finem celebrat, offert re ipsa sacrificium pro excommunicatis quorum singuli, pro suis quisque dispositionibus, fructum sacrificii percipiunt.

Secunda pars eadem fere ratione probatur; si enim licitum sit offerre sacrificium pro omnibus peccatoribus et excommunicatis in genere, cur item non liceret offerre pro quibusdam in specie? Benedictus XIV refert, nec ullo modo improbat textum Bellarmini in quo dicitur licere sacrificium offerre pro aliquorum hæreticorum conversione, « modo nihil addatur ad missam, sed solum per intentionem sacerdotis applicetur sacrificium. » Re quidem vera, quando S. Paulus nos admonet orare pro omnibus hominibus in sacris mysteriis, id non solum pro omnibus in communi commendat, sed etiam pro singulis; debemus enim unumquemque in singulari his orationibus adjuvare. Insuper, pro illis offerri potest sacrificium pro quibus ipse Christus se Deo Patri obtulit: atqui Christus pro excommunicatis, sicut pro aliis peccatoribus se obtulit.

Nihil obstat, neque ex natura rerum, neque ex parte Ecclesiæ quominus oblatio sacrificii fiat sensu explicato. 1º Non quidem ex natura rerum; quamvis enim excommunicatus sit exsors suffragiorum Ecclesiæ, non idcirco est incapax recipiendi gratias quæ, aliter quam per communionem ecclesiasticam, a